

## Inatsissatut siunnersuummut oqaaseqaatit

**Oqaaseqaatit nalinginnaasut****1. Aallaqqaasiut**

Naalakkersuisut aalajangerput akileraarusersuinerup allangortinneqarnissa siunnersuutiginiarlugu, ilaatigut nuna tamakkerlugu akileraarutip 2013-imiit procentimik ataatsimik appartinneqarneranik malitseqartussamik, takukkit, 2013-imut aningaasaqarnermut inatsisissatut siunnersuummi (UKA 2012/xx). konto 24.10 pillugu oqaasertaliussanut nassuiaatit.

Akileraarutit procentimik ataatsimik appartinneqarnerat Nunatta karsiata 72 mio. koruuninik isertitakinnerulerneranik kinguneqassaaq.

Inatsisissatut siunnersuut una aningaasarsianit akileraarutit pillugit inatsisip allangortinneqarneranik, akileraarusersuinerup allangortinneqarneranut aningaasalersuisooqataasussamik maannakkullu akileraaruseeriaatip naleqqutinngitsortaanik iluarsiinissamik imaqqarpoq. Siunnersuut, qalerallit avataasiorluni pisarineqartut akitsuutaat pillugu Inatsisartut inatsisissaattut siunnersuummut kiisalu qamutit motorillit akileraarutaat pillugit Inatsisartut inatsisaasa aamma nioqqutissanik eqqussuinermi akitsuutit pillugit Inatsisartut inatsisaasa allangortinneqarnissaannut siunnersuutinut ataatsimoorussamik saaqummiunneqartunut atuumassuteqqarpoq.

Aningaasarsianit akileraarutit pillugit Inatsisartut inatsisaata allangortinneqarnissaanut siunnersuuteqqarnermi, inuinnaat ernianut akiliutiminnik ilanngaateqqarsinnaanerisa killersimaarneqarnissaat, utaqqiisaasumik ineqartitaanerup nalingata akileraaruserneqartalernissaa, aammalu selskabit namminersorlutillu inuussutissarsiornermik ingerlataqartut akileraarnermi nalikilliliisinnaanerinut malittaarisassat allangortinneqarnissaat siunertarineqarpoq.

*Allanguinissamut siunnersuutit*Ernianut aningaasartuutit ilanngaatigineqqarsinnaanerisa killilerneqarnissaat

Ernianut aningaasartuutit ilanngaatigineqqarsinnaanerisa maannamut atuutsinneqartup, annertunerusumik aningaasarsiakkaat aningaasanik nammineerluni atugassanik taarsigassarsianarsinnaanermut salliutippaat. Ernianut akiliutit ilanngaatigineqqarsinnaanerisa, inuit ataasiakkaat imaluunniit ilaqutaariit taarsigassarsinertik aqutugalugu ajunngitsorsiamik, inuiaqatigiinnit aningaasartuutigineqarneranik akiliisinneqartannginnerinik kinguneqarpoq. Pingaartumik aningaasarsiakkaat, pigisamik aalaakkaasumik pisinissaminnut, biilisinissaminnut aamma angallatinissaminnut annertunerusunik taarsigassarsiniarsinnaanermut periarfissaqartut, aningaasaqarniarnikkut malunnartumik iluaqutigisinnaavaat.

Ernianut aningaasartuutit ilanngaatigineqqarsinnaanerisa, nunatta inuussutissarsiornerup aningaasallu tungaasigut ingerlatsineranut kingunerivaa, pisortat aningaasaqarniarnerisa tamaviaartinneqarnerat. Tamatuma ilaatigut takussutissartarivaa, sulinermit aningaasarsiat akileraaruserneqarnerata, ernianut aningaasartuutininik ilanngaateqqarsinnaasoqartinnagu qaffasinerneruna.

Ernianut aningaasartuutit ilanngaatigineqarsinnaanerit akileraarutitigut akissaajaatit naatsorsuutigisariaqarpoq. Akileraarutitigut akissaajaat immikkut iliuuseqarfiginninnermik, soorlu akileraartussaataaanginnermik imaluunniit ilanngaatiginissinnaatitaanermi pinngortinneqartarpoq. Akileraarutitigut akissaajaatit annertusiartortillugit, akileraaruseeriaatsikkut allanik isertitsiniaasinnaanermik piunasaqaat alliatussaaq. Allatut oqaatigalugu akileraarutitigut akissaajaatit appartinneqassappata, allatigut akileraarusiineq appartinneqarsinnaavoq.

Ernianut aningaasartuutit ilanngaatigineqarsinnaanerit mannaakkut akileraaruseriaatsimut ilaa-tinneqarluinnartuuvuq, taamaammallu taarsigassarsiniarlutik eqqarsaateqartut ataasiakkat, pigisamik aalaakkaasumik pisinissamut, biilisinissamut angallatinissamulluunniit atugassaminnik qanoq annertutigisumik taarsigassarsiniarnissamik aalajangerniarnerinut sunniuteqartarluni. Taamaattumik ernianut aningaasartuutit ilanngaatigineqarsinnaanerisa allannguiffigineqarnerani taarsigassarsiniartussat pilersarusiorsinnaanissaannik periarfissinneqarsinnaasariaqarput. Naalackersuisut ernianut aningaasartuutit ilanngaatigineqarsinnaasut, annerpaamik 10 procentimik appaavigineqarnissaannik siunnersuuteqarnermikkut tamanna anguniarpaat.

#### Utaqqiisaasumik ineqartitaanerit

Akissarsiat aningaasannigitsut aammalu atorfeqartitaanermut atatillugu sulisitsisumit ajunngit-torsiat allat tunngaviusumik akissarsiatut aningaasannorlugit tunniunneqartartut allatulli akileraarutaasussaataapput.

Akileraaruteqaataannigitsumik utaqqiisaasumik ineqartitaasarneq ukiorpassuarni atuutinneqar-simavoq, sulisut sulisitsisuminnit tamakkiisumik ilaannakoortumilluunniit akeqanngitsumik ineqartinneqaraangata.

Naalackersuisut utaqqiisaasumik ineqartitaanermut akiliisalernissaq sulissutigisimagaluar-paat, kisiannili iluatungilerneqarsimallutik isumaqartunik tamanna isumaqatigiissutitigut ilu-arsiivigineqarsimasoq. Utaqqiisaasumik ineqartitaanermut akiliisalernissaq Naalackersuisunit suli anguniagaavoq, kisiannili isumaqatigiissutitigut allannguniarnerit annertuut sivisusarneri pissutigalugit, Naalackersuisut aalajangerput siunnersuutiginiarlugu, atorfeqartitaanermut ata-tillugu tamakkiisumik ilaannakumilluunniit ineqartitaanerup akileraarutitigut pineqartarneri assigalugit, utaqqiisaasumik ineqartitaasarnerup nalinga akileraaruserneqartassasoq.

Ukiorpassuarni akileraaruteqaataannigitsumik utaqqiisaasumik ineqartitsisarsimaneq innersuu-tigalugu, pissusissamisoornerpaavoq aningaasarsianit akileraarutit pillugit inatsisip allanngor-tinneqarneratigut pineqartunik akileraarusiisoqartalernissaa.

#### Akileraartarnermi nalikilliliinerit

Tunngaviusumik periusiuvoq, suliffeqarfiup anguniakkaminut attuumassuteqartumik akissaa-jaateqarsimasup, akissaajaatigisimasani ukiumi aningaasarsiorfiusumi isertitami naatsorsor-nerinit ilanngaatigisinnaallugit. Kisiannili tamanna atuutinnigilaq suliffeqarfik, atorussaminik (soorlu usisaatinik), suliffeqarfik aningaasarsiorniarnermi ukiumi arlalinni atorneqarsinnaa-sunik pisisimatillugu. Taamatut pisoqartillugu pisiarinninnermi akissaajaatit ukiumi pisiffiu-sumi nalinginnaasumik tamakkiisumik ilanngaatigineqarsinnaasannigillat, kisiannili ukiumut ataatsimut ukiunulluunniit marlunnut amerlanerusunulluunniit agguataarneqartariaqartarlutik.

Akilerartarnermi nakilliliinermi malittarisassat siunnertarivaat, pigisat inuussutissarsiornermut atatillugu atorneqartussatut pisiarineqarnerini aningaasartuutit ukiunut arlalinnut agguataarlugit ilanngaatigineqarsinnaanerit. Akilerartarnermi nalikilliliinerit, pigisat ataasiakkaat piviusumik naleerukkiatornerinik tamatigut nililiinerusangilaq. Pisariillisaaniarluni akilerartarnermi nalikilliliisarnerit atoruminarsagaapput, suliffeqarfiillu ataasiakkaat qanoq annertutigisumik nalikilliliinissaminnut periarfissinneqarlutik. Akilerartarnermilu nalikilliliinerit, aningaasaliinissat siuartinissaannut imaluunniit kinguartinnissaannut sakkutut ilaatigut atorneqartarlutik.

Pigisat nalikillilerneqarsinnaasut tunineqarnerinut atatillugu iluanaarutit annaasalluunniit, pigisat tunineqarnerani akigititap nalikillilerneqareerneranilu nalingata nikingassutaanit naatsorsorneqartarput. Pigisat ingerlatsineri atorneqartut (umiarsuit, timmisartut, illuutit il.il. pinnagit) pineqartillugit, periuseq immikkut ittoq, aningaasat pissarsiat atugaasullu nikingassutaannut assigiisitsissummik taaneqartartoq atorneqartarpoq, taamaattoqartillugu naatsorsueriaaseq siuliani taaneqartartoq atorneqartangilaq.

Akilerartarnermi nalikilliliinerit, pigisat naleerukkiatornerinit sukkanerusumik nalikillilersuinissamik periarfissitsisut, akilerarutitigut aningaassartuutaapput, erniat qulaani pineqartut assigalugit, suliffeqarfiit akilerarusiinissaminnik kinguartitsisinaanerinik malittarisassatigut periarfissaqarmata.

Nalikilliliisinnaanermut malittarisassat atuuttut arlalitsigut iluaqutaassuseqarput taamaammallu suliffeqarfiit iluarnaarutimik akilerarutiginissaannik kinguartitsinissamik annertuumik periarfissillugit.

Selskabit nalinginnaasumik nalikilliliisinnaatitaanerup saniatigut ukiumut iluarnaarutit affai angullugit nalikilliliisinnaatitaapput (sinneqartoorutit akileraruteqaatiginissaasa, akilerarutitigut nalikilliliissuteqarnerunikkut kinguartinneqarnerat). Aqqissuussinerup tamatuma sumik siunertaqavinnera nassuarneqarsinnaangilaq. Taama iliorneq selskabit akiliisinnaassuseqarnerinut toqqaannangitsumik ikiorsiissutaavoq imaluunniit erniaqanngitsunik taarsigassarsititsineruvoq, pissutsinik selskabinut imaaluunniit inuiaqatigiinnut atuumassuteqartumik patsisilerneqarsinnaangitsaq. Taamaatut aqqissuussinerup inuiaqatigiit, akilerarutissaanik amerliartortillugit kinguartinneqartunik annaasaqarnerannik pilersitsisinnaavoq.

Selskabit 100.000 koruunit angullugit nalilinnik ukiup ingerlanerani pigisanik pisiarineqarsimasut, pisiamik nalingi tamakkerlugit akilerarutitigut nalikilliliissutigisinnaanerinut aamma periarfissaqartinneqarput. 100.000 koruuninut killiliisimaneq nalinginnaangitsumik qaffasip-poq. Sanilliussigaanni Danmarkimi killigititaasoq 12.300 koruuniuvoq.

Selskabit maannakkut taama qaffasitsigisumik ingerlaannartumik nalikilliliisinnaanerit ersarissumik siunertaqarsorinangilaq. Sinneqartoorutit akileraruteqaatiginissaasa akilerarutitigut nalikilliliissuteqarnerunikkut kinguartinneqarsinnaanerit assigalugit selskabit akiliisinnaassuseqarnerinut toqqaannangitsumik ikiorsiissutaavoq imaluunit erniaqanngitsunik taarsigassarsititsineruvoq, pissutsinik selskabinut imaluunniit inuiaqatigiinnut atuumassuteqartumik patsisilerneqarsinnaangitsaq. Taamaatut aqqissuussinerup inuiaqatigiit, akilerarutissaanik amerliartortillugit kinguartinneqartunik annaasaqarnerannik pilersitsisinnaavoq.

Namminersorlutik inuussutissarsiornermik ingerlataqartut killilersugaanngitsumik nalikillilersuinissaminut periarfissaqartinneqarput. Kisiannili nalikilliliinerat namminersorluni inuussutissarsiornermik ingerlataqarnermi iluanaarutinit annertunerusinnaanngilaq.

Taamaammat namminersorlutik inuussutissarsiornermik ingerlataqartut akileraartarnermi nalikilliliisinnaaneri, pigisallu nalikilliliinermut tunngavigineqartut naleerukkiartorneri imminnut attuumassuteqanngillat.

Taama pisariitsigisumik nalikilliliisinnaanerup ajornerpaamik malitsigisinnaavaa, akileraaruteqannginnissaq kisiat siunertaralugu aningaasalersuineq. Inuiaqatigiit aningaasalersorniarninut, aningaasalersueriaatsit tamatut ittut pitsaanerpaajunngillat.

Taamaammat namminersorlutik inuussutissarsiornermik ingerlataqartut maannakkut pisariitsumik akileraartarnermi nalikilliliisinnaaneri allannguiffigineqarnissaat patsissisaqarluarpoq.

Namminersorlutik inuussutissarsiornermik ingerlataqartut, arlalitsigut selskabit ingerlatta-gaannik, sorlu sanaartornermik imaluunniit niuerneramik ingerlataqartarmata, assigiimmik unammilleqatigiissinnaanissaq eqqarsaatigalugu namminersorlutik inuussutissarsiornermik ingerlataqartut selskabillu assigiimmik nalikilliliisinnaanermut malittarisassaqtittariaqarneri pissusissamisooruuvoq.

Taamaakkaluartoq, selskabit akileraarutissaminnik iluanaarutisiallu akileraarutaasa akilerneqarnissaannut malittarisassaatt immikkut ittut maluginiartariaqarput, malittarisassat naapertorlugit selskabit sinneqartoortiminnit akileraarutissaminnik kinguartitsisinnanerinik periarfissinneqarnerat, namminersorlutik inuussutissarsiornermik ingerlataqartut taamatut periarfissinneqarnerinit annertuneruvoq.

Tamatuma selskabit pigisamik pisiarineqarnerini nalingisa tamarmisup nalikilliliisinnatitaanerinut killigititaasumik qaffasinnerusumik aalajangiineq tunngavilersinnaavaa. Namminersorluni inuussutissarsiornermik ingerlataqartunut killigititaasup qaffaavigineqarnerata, suliffeqarfiit mikisut minnerusullu, qaqutigunnaq annertuunik pisisartut iluaqusetussaassavai.

#### *Aaqqissuusseqqinnermik suliaqarneq*

Inatsisissamut siunnersuut, akileraartarnermut-, ineqarnermut-, isumaginninnermullu inatsisit annertunerusumik allanngortiternissaannut pilersaarutit aallarnisarnerinut siullernut ilaavoq.

Akileraaruseeriaatsip allanngortinneqarnera, ilinniagaqarnissamut suliffeqarnissamullu pilersitsilerneratigut, atugarissaarnerup patajaatsumik aningaasalersorneqarnissaanut pilersitseqaataassaaq. Tamatumalu ilutigisaanik akileraaruseeriaaseq pisariitsuullunilu paasiuminartuusaaq isertitallu assigiissinneqarsinnaasut assigiimmik akileraarusersorneqartarnissaat qulakkiissallugu. Tamatuma saniatigut akileraarutit aqutugalugit tapiissutaasartut malunnaatilimmik appaaffigineqassapput. Aammattaq akileraarutit pillugit inatsisit ineqarnermut, isumaginninnermullu inatsisinut naleqquttuutinnissaat qulakkeerneqassaaq, nammineq pilersorsinnaanissap allatullu agguartaarinissap nukittorsarneqarnissaa siunertaralugu.

Akileraaruserinermik-, ineqarnermik-, isumaginninnermillu suleriaatsip allanngortitseriviginissaat annertoorsuuvoq, taamaammallu suliniutissat malittarisassallu allannguutissaannut

siunnersuusiornissat assigiinngitsut piffissaqarlualuni eqqartorneqarnissaat pisariaqarluni. Tamatumalu ilutigisaanik ilimagisariaqarpoq, allannguinerit tulleriaat ukiut arlallit ingerlanerini atuutikkiartuaarneqassasut, innuttaasut suliffeqarfiillu malittarisassanik nutannik sungiusiartuaarnissaanik periarfissikkumallugit.

Taamaattumik Naalackersuisut aalajangerput, aaqqissusseqqinnermik suliaqrneq immikkoortitaarlugu ingerlanneqassasoq, siunnersuut manna immikkoortitaarinninnermut siullermut ilaavoq. Immikkoortitaarinninnerit aappat, 2013-imi UKA-mi saqqummiunneqartussat ilimagineqartumi soraarnerussutisiat pillugit malittarisassat, taakkununga ilanngullugu soraarnerussutisiat akileraaruserneqartarnerisa allannguiffigineqarnissaanik, aningaasaatillu akileraaruserneqartalernissaanik siunnersuummik imaqartussavoq, immikkoortitaarinninnerillu pingajuat akileraarutit pillugit inatsisip allanngortinnissaanik sinneruttunik aammalu ineqarnermut-, isumaginninnermullu inatsisit allannguiffigineqarnerannik imaqartussaq 2014-ip aamma 2015-ip ingerlanerini Inatsisartunut saqqummiunneqarnissaat ilimagineqarpoq.

#### *Sulinerup akileraaruserneqartarnera*

Akileraartarnermut Atugarissaarnermullu Ataatsimiititaliap isumaliutissiissutimini, sulinerup qaffasippallaamik akileraarusersorneqarnerata malitsigisai pitsaanngitsut eqqartorpai.

Sulisitsisoq atorfinitsitsigaangami sulisitami aningaasarsiai, sulisoqarnermullu akitsuut ilaatiqut akilertussaavai. Sulisulli aningaasarsiat akileraarutissanik ilanngaateqareersut taamaallat pissarsiarisarlugit. Sulisulli aningaasarsiaasa ilanngaattissat ilanngaatigereerlugit annertussusiisa atuisinnaanermut periarfissai aalajangertarpei. Sulisitsisup sulisitaminut akissarsiarititanut aningaasartuutai amerliartortillugit sulisussarsiortarnera annikilliertussaaq. Sulinermilli aningaasarsiat ilanngaattissat ilanngaatigereerlugit annikilliertorneri malillugit sulinissamik neqerooruteqartut ikiliartussapput. Sulisut aningaasarsiaannik qaffasissumik akileraarusersulinerup annikinnerusumik sullittoqalerneranik, taamatullu aningaasaqarnikkut ingerlatsinermik annikillisaalerneramik kinguneqartitsisussaavoq.

Akileraarutit akitsuutillu atugarissaarnerup aningaasalersorneqarnissaanut pisariaqartinneqarput. Taamaakkaluartoq akileraaruseriaatsip pitsaanngitsumik sunniutigisinnaasaasa annerpaamik killilersimaarnissaat pingaaruteqarpoq. Tamanna ilaatigut sulinermi akissarsiat naammaannartumik akileraarusersorneqarnerisigut aamma isertitat assigiinngitsut assigiinnerusumik akileraarusersorneqarnerisigut pisinnaavoq.

Akileraarutip procentimik ataatsimik appartinneqarnera taassumalu aningaasalersorneqarnera annertuumik allannguinerunngilaq. Kisianni aallartinneruvoq. Naalackersuisut taamatut siunnersuuteqarnermikkut ukiuni aggersuni akileraartarnermut,- ineqarnermut aamma isumaginninnermut inatsisinik aaqqissusseqqinnisami tunaartarisatik takuterusuppaat.

## **2. Inatsissatut siunnersuutip imarisaa**

Siunnersuutigineqarpoq aningaasarsiat akileraaruteqaataasussat naatsorsorneqarneranni, nammineq atugaasatut taarsigassarsiat erniaannut aningaasartuutit, akiliutigineqartut 90 procentiannut killilerlugu ilanngaatigineqarsinnaassasut. Killiliineq atuutissanngilaq aningaasartuutit namminersorluni inuussutissarsionermik ingerlataqarnermut attuumassuteqarpara.

Akilaartartuq inissiamik pisisanerminut atatillugu taarsigassarsiami erniaanut soorlu 50.000 koruuninik aningaasartuuteqarsimappat, taava akilaartartup aningaasarsiaasa akileraruteqaataasussat naatsorsornerini taamaallaat 45.000 koruunit ilanngaatigineqarsinnaassapput.

Ilanngaat aalajangersimasoq, takuuk inatsimmi § 21, pillugu malittarisassaq allanngortinneqassanngillat. Ilanngaat aalajangersimasoq 2013-imi 10.000 koruuniuvoq. Suliaticigut kattuffinnut ilaasortaanermut akiliutit, ernianut aningaasartuutit annikkillilisat akilaartarnermilu ilanngaatigineqarsinnaasut allat katinneri, ilanngaatip aalajangersimasup angissusaanik annerunngippata, akilaartussaataitaasut maannakkutut ilanngaat aalajangersimasoq ilanngaatigisinnaassavaat. Akilaartartunut annikinnerusumik ernianut aningaasartuuteqartunut siunner-suut suuniuteqassanngilaq.

Ernianut aningaasartuutit nammineq atugassanut imaluunniit namminersorluni inuussutissarsiornermut attuumassuteqartuunerisa aalajangiffiginiarneri amerlanertigut ajornartorsiutaanaviannngilaq. Kisiannili akilaartuq namminersorluni inuussutissarsiornermik ingerlataqartillugu qularnartoqalersinnaavoq. Naatsorsuusiornermi nammineerlunilu nalunaarsuineri inuussutissarsior tup, aningaasartuutimi akuleriissut allat assinginik ernianut aningaasartuutini namminneq atukkaminut inuussutissarsiornerminullu attuumassuteqarneri appequtaatillugit agguataasavai. Aningaasarsiat akileraaruteqaataasussat angissusilerniarnerini, agguataarisimaneq pisariaqarpallu allaanerusumik angissusiliinissaq akileraaruseriffiup naliliiffigissavaa. Angissusiliinermik aalajangiinerit allat assigalugit akileraaruseriffiup aalajangiinera Akilerarusiinermik aalajangiisartunut nammagittaalliutigineqarsinaassaaq.

Naalackersuisut anguniagarivaat utaqqiisaasumik ineqartitaasut aamma utaqqiisaasumik inigisassaq sioqqullugu inissiani ineqartitaasut, attartortut allat assigalugit ineqarnerminnut akiliuteqartarnissaat. Apeqqtut pillugu suliaticigut kattuffiit oqaalliseqatigineqarsimapput, taakkuli ilaat isumaqarput apeqqtut isumaqatigiinniutissaasoq. Taamaattumik utaqqiisaasumik ineqartitaanermi ineqarnermut akiliuteqartalernissap atuutsilersinnaanera imaaliallaannaq pisinnaanngitsoq naatsorsuutigisariaqarpoq.

Utaqqiisaasumik inigisasaq sioqqullugu inissiani ineqartitaasarnerup aamma utaqqiisaasumik ineqartitaasarnerup maannakkut atuutsinneqartup eqqunngitsumik malitsigisaasa iluarsiivigineqarnissaat siunertaralugu siunnersuutigineqarpoq aalajangersakkamik, tamakkiisumik ilaannakortumilluunniit akeqanngitsumik utaqqiisaasumik inigisasaq sioqqullugu ineqartitaanarup aamma utaqqiisaasumik ineqartitaanarup nalingisa aningaasarsiat akileraaruteqaataasussat naatsorsornerinut ilaanngunneqartussaananerik paatsuugassaannngitsumik aalajangersaakkamik ilanngussisoqassasoq.

Tamakkiisumik ilaannakortumilluunniit akeqanngitsumik ineqartitaanerit, periutsit aalajangersimasut tungavigalugit ullumikkut akileraarusersorneqarput, takuuk Akilaartarnermut Aqutsisoqarfiup nalunaarutai nr. 61 aamma 62, 8. september 2011-meersut. Akileraarusiineq inatsimmi § 13 tunngavigalugu pisarpoq.

Utaqqiisaasumik inigisassaq sioqqullugu ineqartitaasarnermut aamma utaqqiisaasumik ineqartitaasarnermut atatillugu ullumikkut akileraarusiisoqarnek ajorpoq. Periuseq taanna paasisat naapertorlugit akilaartarnerup nunami maani eqqunneqarneraniit atuutinneqarsimavoq.

Tamanna tunngavigalugu naleqquttuosorinarpoq, ineqartitaanerup akileraarusorneqarnerata atuutinneqarfia immikkut ittumik aalajangersaanikkut iluarsiiqqineqarnissaa. Matumuuna isiginiarneqarpoq utaqqiisaasumik inigisaq sioqqullugu ineqartitaasernerup aamma utaqqiisaasumik ineqartitaasernerup akileraaruserinikkut suliarineqarnerata inatsisitigut aalajangersarneqarnera, pineqartunut tamanut iluaqutaasussaana.

Sulisitsisut pisussaaffigisussaassavaat, utaqqiisaasumik ineqartitsinerup nalinga aningaasarsiat B-tut nalunaarutiginnissaa.

Siunnersuutigineqarpoq akileraartarnermi nalikilliliinermi malittarisassat makkunatigut allanngortinneqassasut:

- Sinneqartoorutit akileraaruteqaatiginissaasa akileraarutitigut nalikilliliisuteqarnerunikut kinguartinneqarsinnaanera pillugu malittarisassap atorunnaarsinneqarnera.
- Selskabit ingerlaannaq nalikilliliisinnaanerinut killigitap 15.000 koruuninut appartinneqarnera.
- Selskabit namminersorlutillu inuussutissarsiornermik ingerlataqartut nalikilliliisinnaanerisa naligiisitaalernissaat, namminersorluni inuussutissarsiornermik ingerlataqartulli ingerlaannaq nalikilliliisinnaanerat 50.000 koruuninut angissuseqartillugu.

Allannguinerit siunertaraat pigisat naleerukkiartuvinnerisa akileraartarnermilu nalikilliliisutigineqarnerisa imminnut ataqatigiinnerulernissaat aammalu akileraarutissanik kinguartitsisarnertigut inuiaqatigiit annaasaqarsinnaanerisa killilersimaarniarneqarnissaat.

### **3. Pisortanut aningaasaqarnikkut allaffissornikkullu sunniutissat**

Naatsorsuutigineqarpoq allannguutit isertitassanut sunniuteqassasut ima:

1. Nammineq atugassatut taarsigassarsiat erniaanut aningaasartuutit ilanngaatigineqarsinnaanerisa killiliiffigineqarnera 12 mio. koruunit.
2. Tamakkiisumik ilaannakortumilluunniit akeqanngitsumik ineqartitaanerit akileraaruserneqarnerat 5 mio. koruunit.
3. Akileraartarnermi nalikilliliinermi malittarisassanik naleqqussaaneq 21 mio koruunit (ataavartumik sunniuteqartoq)

Isertitassat tamarmiusut agguataarinnittarnermi periutsit malillugit miss. 75 %-mik kommuninut aamma 25 %-mik Namminersorlutik Oqartussanut agguataarneqassapput.

Nalikilliliisinnaanermi malittarisassat allanngortinneqarnerinut atatillugu maluginiartariaqarpoq naatsorsuutigineqarmat, isertitassat tamarmiusut piffissaq qanittoq eqqarsaatigalugu 44 mio. koruunit angullugit annertussuseqassasut. Allannguinerit tunngaviumik akileraarusigassanik siuartitsinerupput. Siuartitsineq taamatut ittoq nunap aningaasaqarneranut ataavartumik sunniuteqarpoq. Ataavartumik sunniut 21 mio. koruuninik annertutigissussatut naatsorsuutigineqartup ersersippaa, nunap aningaasaqarniarnerata ukiut arlallit ingerlaneranni qanoq annertutigisumik qaffariaateqarnissaa naatsorsuutigineqartoq.

Nuna tamakkerlugu akileraarut 2013-imiit procentimik ataatsimik appartinneqartussaanaera pissutigalugu, allannguinerit malitsigisaannik isertitanit tamarmiusunit kommuunit annertu-

nerusumik pissarsiassaqtussaalernissaat tunngavigalugu, kommuninut ataatsimoortumik tapiissutit naleqqussartariaqassapput.

Nammineq atugassatut tarsigassarsiat erniaannut aningaasartuutit ilanngaatigineqarsinnaasut killilerneqarnerisigut allaffissornikkut amerlanerusunik sulisoqarnissamik pisariaqartitsinissaq naatsorsuutigineqarpoq pingaartumik aalajangersakkap atuutilernerani. Aningaasarsianik akileraaruteqaataasussanik angissusilersuinernut atatillugu 2014-imi aamma 2015-imi sulisut pisariaqartitat marlunnik ilaneqartariaqartut nalilerneqarpoq, tamatumalu kingorna pisariaqartitat 1-1,5-nut appassasut naatsorsuutigineqarluni.

Sulisunik amerlanerusunik pisariaqartitsineq Aningaasaqarnermut Nalakkersuisoqarfiup atugassaasa iluani aningaasarlersorneqassaaq.

#### **4. Inuussutissarsiutilinnut aningaasatigut allaffissornikkullu sunniutissat**

Akileraarutitigut nalikilliliisinaanerup allanngortinneqarnerisa kingunerisassaanik, piffissaq qanittoq eqqarsaatigalugu, inuussutissarsiutillit akileraarutaat 44 mio. koruunit angullugit amerleriarnissaat naatsorsuutigineqarpoq. Allannguinerit tunngaviumik akileraarusigassanik siuartitsinerupput. Siunissaq ungasinnerusoq eqqarsaatigalugu, isertitanut tamarmiusunut siunnersuutip sunniutaa 21 mio. koruuninut appassaaq, takukkit qulaani immikkoortumi 3-mi allassimasut.

Siunnersuutip malitsigisaanik inuussutissarsiutillit akileraartarutitigut nalikilliliissutissatut tunngavigisassaasa naatsorsortarnerinut aamma ernianut aningaasartuutit nammineq atugasatut taarsigassarsianut inuussutissarsionermik ingerlataqarnermulluuniit atuumassuteqarnerisa immikkoortinniarnerinut atatillugu, allaffissornikkut aningaasartuutaasa qaffarianissaat naatsorsuutigineqarpoq. Aningaasartuutit taakkua tutsuviginartumik missingersornissaat ajornarsimavoq.

Allanngutit pineqartut pissutigalugit selskabit aningaasartuutaasa qaffariarnissaat ilimagineqanngilaq.

#### **5. Avatangiisinut, pinngortitamut, peqqissutsimullu sunniutissat**

Siunnersuutip avatangiisinut, pinngortitamut peqqissutsimullu sunniuteqarnissaa ilimananngilaq.

#### **6. Innuttaasunut sunniutissat**

Siunnersuutip malitsigisaanik nammineq atugassat erniaasa ilanngaasersornerisa killilernerisigut aammalu utaqqiisaagallartumik inigitinneqartut tamakkiisumik ilaannakortumilluuniit akileraarusernerisigut innuttaasut akileraarutaat 17 mio. koruuninik qaffariarnissaat naatsorsuutigineqarpoq. Tamatuma saniatigut ilimagineqarsinaassaaq, inuussutissarsiutillit nalikilliliisinnatitaanermi malittarisassat allanngortinneqarnerisa kingunerisaaanik aningaasartuuteqarnerulernertik matussuserumallugu, akigitittakkaminnik il.il. qaffaanissaat. Tamatuma sunniutissaa paasissutissat pissarsiarineqarsinnaasut tunngavigalugit nalilerneqarsinnaanngilaq. Innuttaasulli akileraarnerulernissaat Nunap



Karsianut akileraarutaasartut 1 procentimik appartinneqarnerisigut katillugit 72 mio. koruuninik akileraarutitigut appaanermik kinguneqartussa q killormut sunniuteqassaaq, taamaasilluni akileraarutit ilanngaatigereerlugit aningaasat innuttaasut tigusartagaat pitsaasumik innuttaasunut tussaaq.

Siunnersuut innuttaasunut allaffissornikkut sunniuteqarnissaa ilimanangilaq.

## **7. Sunniutissat pingaasutillit allat**

Inatsisissatut siunnersuut allanik pingaarutilinnik sunniutissaqanngilaq.

## **8. Oqartussaasunut suliniaqatigiiffinnullu il.il. tusarniaaneq**

Siunnersuut piffissami 29. junimiit 27. Juli 2012-imut makkunani tusarniaassutigineqarpoq: KPMG Grønland aammalu Grønlands Revisionskontor, SIK, Sulisitsisut Peqatigiiffiat (GA), KANUKOKA, Erik Lomholt-Bek (ELB), Aalisarnermut, Piniarnermut Nunalerinermullu Naalakkersuisoqarfik, Ilinniartitaanermut Ilisimatusarnermullu Naalakkersuisoqarfik.

Tusarniaanermi akissutit makkuninga oqaaseqarnissamik pissutissaqalersitsipput:

KPMG Grønland og Grønlands Revisionskontor tusarniaanermi akissutiminni oqaatigaat maluginiarsimallugu siunnersuutip immikkoortua nr. 3 (ingerlatseqatigiiffiit sinneqartooruti-minnik nalikilliliisarnerat) aammalu nr. 4 (ingerlatseqatigiiffiit ingerlaannartumik nalikilliliisarnerat) ukioq isertitaqarfiusumi 2012-mi atuutilersinneqassasoq.

KPMG Grønland og Grønlands Revisionskontor-ip kaammattuutigaa, malittarisassanut mas-sakkut atuuttunut sanilliullugu sukaterinissat, aatsaat 2013-mi atuutilersinneqassasut, suliffe-qarfiit arlallit malittarisassat maannakkut atuuttut tunngavigalugit missingersuusiorsimamma-ta, taamaalillutillu nalilinnik nalikillilersinnaasaminnik pissarsiniarsimammata naatsorsuutiga-lugu, ingerlatsiviit akileraarutaannik kinguartitsinermikkut pisinerminni aningaasartuutimin-nik matussusiisinaanissartik, taamatuttaaq nunani allamiut uuliasiornermut aatsitassarsior-nermullu tunngatillugu nalornilersinneqarsinnaaner at eqqarsaatigalugu.

*Selskabit nalikilliliisinaanermut periarfissaasa sukaterneqarnerat ikioq isertitaqarfiusumi 2012-mi atuutilernissaata malitsigissavaa, selskabit akileraarutaasa 2013-mi akilerneqartus-sat qaffasinnerunera. Allannguutit ukioq aningaasarsiorfiusumi 2013-mi aatsaat atuutilersin-neqassappata tamatuma malitsigissavaa ingerlatseqatigiiffiit akileraarutaasa annertuseriar-nerat aatsaat 2014-mi malunniuteqassasoq.*

*Inuit akileraarutaasa 1 procentimik apparneqarnissaanik siunnersuut 2013-mi akileraarutiti-gut isertitat appariarnerannik kinguneqartussaamat, aningaasanut inatsisip oqimaaqati-*

*giinnissaa eqqarsaatigalugu pisariaqarpoq ukiumi tassani aningaasaliissutissat qulakkeerneqarnissaat. Tassunga atatillugu nalilerneqarpoq, selskabit sinneqartoorutiminnik nalikilliliisarnerisa allanngortinneqarnissaa aammalu ingerlaannartumik nalikilliliisarnerup allanngortinneqarnissaa pissusissamisuuksat. Matumanilu isiginiarneqarsimavoq, selskabit ikittuinnaat missingersuusiornerminni sinneqartooruteqartoqassappat sinneqartoorutissat annertussusissaanik naatsorsuutiginnereerlutik taamaalillutillu sinneqartoorutinit nalikilliliinissap annertussusissaanik missiliuuteqareerlutik. Tamatuma saniatigut ingerlaannartumik nalikilliliisinnatitaanermut tunngatillugu 100.000 kr.-imiit 50.000 kr.-mut appaanissaq selskabit aningaasaliisinnassusaannut aalajangiisuusumik sunniuteqarnissaa ilimagissallugu pissutissaqanngilaq.*

*Imaaliinnarlugu nalineruminaappoq, selskabit nunani allaneersut immikkut pingaarutilittut isigissaneraat, Naalakkersuisut pisumi matumani ukiumi aningaasarsiorfusumi ingerlasumi inatsisitigut allannguutit atuutilersissallugit periarfissamik atuinerat tunngavigalugu. Matumanili periuseq atorneqartoq siusinnerusukkut atorneqareernikuuvoq, soorlu assersuutiginarlugu nalikilliliisinnanermut malittarisassat maannakkut atuuttut Inatsisartut 2001-imi ukiakkut ataatsimiinneranni atuuttussanngortinneqarsimasut. Taamaammat siunnersuutip matuma pilersitaanik nunani allamiut aningaassaliarlutik pilersaaruteqartunik annertunerusumik nalornilersinneqarnerannik kinguneqarsinnaanerannik ilimasussalluni pissutissaqarsorinannngilaq.*

SIK-p tungaaniit tusarniaanermi akissummi tikkuarneqarpoq, ernianut aningaasartuutit ilanngaatigineqarsinnaaneratt namminersortunut apparneqarpat innuttaasut namminneq pigisaminnik initaarsinnaasut ikileriarnissaat aarleqqutigineqarsinnaasoq.

*Ernianut aningaasartuutit ilanngaatigineqarsinnaasut appartinneqarnissaa nuna tamakkerlugu akileraarutip appartinneqarnissaanut ataqatigiissillugu isigineqartariaqarpoq. Nuna tamakkerlugu akileraarutip apparneqarneratigut taarsigassarsiniartut taarsigassarsiamik erniaanut aningaasartutit annertunersusut nammineq aningaasartuutiginissaannut periarfissarissaarnerulissapput. Nuna tamakkerlugu akileraarummik 1 procentimik appaaneq aammalu ernianut aningaasartuutit ilanngaatigineqarsinnaasut 10 procentimik apparneqarneratta, aningaasarsiorlut assigiinngitsut akornanni amerlanerpaat aningaasatigut inissisimallu-nerannik malitseqassaaq. Allannguinerup kingunerisaanik inuit ilaat aningaasanik tigori-aannarnik ikinnerusunik peqalissapput. Taamaattorli taakku annaasaat agguaqatigiissa-gaanni ima annertutiginnngilaq, allaat ataasiakkaat namminneq pigisaminnik inissiarisinnaa-junnaarnerannik imaluunniit illusisinnajunnaarnerannik kinguneqassalluni.*

SIK-p ilanngullugu siunnersuutigaa, utaqqiisaagallartumik inigineqartartunut ineqarnermut akiliuteqartoqartalissasoq, taamaalilluni akileraarutitigut aqqiigallarneq atuutsinneqarani,

akileraarutitigut aaqqiigallarnikkut ineqarnermut akiliutissatut takorluukkanut naapertuuttunngorsaanikkut nunatta karsianut isertitsisoqartassaaq.

*Utaqqiisaasumik inigisanut ineqarnermut akiliuteqartitsisalernissamik apeqqut isumaqati-giinniarnikkut suliarisassaavoq, tamannalu piffissaq sivisusissaasoq atorlugu naammassi-niarneqarsinnaavoq. Taamaammat aaqqiissutitut allaanerusutut siunnersuutigineqarpoq, sulinermut atatillugu inigisanut tamakkiisumik ilaannakortumilluunniit akeqanngitsumik inigisaqartitaanerup nalingata akileraarusarnerup annertoqataanik tamakkiisumik ilaan-nakortumilluunniit akeqanngitsumik utaqqiisaasumik ineqartitaaneq akileraaruserneqarta-lissasoq.*

Naalackersuinikkut anguniakkat pillugit Sulisitsisut Peqatigiiffiannit nalilernerqarpoq suli-nermik ingerlataqartunut pingasoqiusamik illugiilluni oqaloqatiginninnissamik tunngaveqar-lutik Naalackersuisut suliniarnerat isumatusaarnerusoq. Sulisitsisut Peqatigiiffiannit kaam-mattuutigineqarpoq, allannguiniarluni suliniutit pillugit naalackersuinikkut allaffissornikkullu ataqatigiissaarisooqartariaqartoq, matumani ilanngullugu pingasoqiusamik oqaloqatiginninnerit ilanngullugit.

*Aaqqissuussaanerup, ilaatigut isumaginninnermut tunngasut, ineqarnermut tunngasut aam-malu pensioneqarnermut akileraartarnermullu tunngasut allanngortiterneqarnissaannut piareersaanermi Sulinermit aallutaqartunik oqaloqatiginninnerit maannakkut ingerlasut qitiulluinnartutut inissisimaqataapput*

Sulisitsisut Peqatigiiffiat isumaqarpoq, akileraarutitigut allannguinnissatut siunnersuutigineqar-toq akileraarutitigut tunngaviinik annertusaataanaviangitsoq, taamatuttaaq isumaginninnik-kut oqimaaqatigiinnerusumik inissisimalissutaanaviangitsoq kiisalu inuiaqatigiit ineriartor-nerannut pitsaanerusunik sinaakkutassaqaqartitsinerulernaviangitsoq.

*Akileraarutissat tunngaviinik oqaaseq, aningaasarsianit akileraaruteqaataasussat naatsor-sornerinuttunngaviusutut paasillugu aallaavigissagaanni, taava akileraaruseeriaatsimik allannguinnissamut siunnersuut, akileraarusersorneqarsinnaasut amerlineqarnerinik imaqar-poq, tassa akeqanngitsumik utaqqiisaasumik ineqartitaanerupnalingata akileraaruteqaataa-sussaalerne aammalu avataasiorluni aalisarnermi qaleralittat akitsuuteqalernissaat Tama-tuma saniatigut ilanngaasiisinaanermut periarfissat arlaqartut killiliivigineqassapput.*

*Naalackersuisut naliliipput allannguiineq isumaginninnikkut oqimaaqatigiissaarinermut pit-sanngoriartitsissasoq. Assersuutigiinnarlugu pingaartumik isertitaqarnerusut tassaassapput ernianut aningaasartuutunik ilanngaasinnaanerup annikilleriartinneqarneranik eqqugaasus-sat. Taamatuttaaq Naalackersuisut eqqarsaatigisimagaluarpaat sulinermi ilanngaait eqqun-neqarsinnaanersut, taamaattorli paasisimavaat, isumaginninnermi tunniuttakkat naatsorsor-*

*neqartarnerat ullumikkut atuuttoq tunngavigalugu, inuit pisortanit ikiorserneqartut imminnut pilersornerulernissaannut kissaatigineqartutut kaammattuutaanaviangitsoq.*

*Sulinermi akileraarutip appartinneqarnera nalilernerneqartariaqarpoq ineriartortitsinermik annertusaataasussatut atuisartut piumasaqarnerisa annertusinissaannik aallaavilik.*

Sulisitsisut Peqatigiiffiannit iliuuseriniakkat sunniutissaat pillugit uppernarsaatit pitsaanerusut ujartorneqarput.

*Suliarilluakkanik aammalu tunngavilersorluakkanik Naalakkersuisut siunnersuutaasa kingunissaannik ataqatigiissumik nalilersuisoqarnikuunngilaq. Siunnersuutit suliaapput paasissutissat ullumikkut pigineqartut aallaavigalugit. Taamaattorli Naalakkersuisut naliliipput, missisueqqissaarnerit, siunnersuutit suliarineqarneranut atatillugu ingerlanneqarsimasut, siunnersuutininut assingusunut sanilliullugit peqqissaarunneqarnerusimasut aammalu sukumiinerusimasut. Taassuma saniatigut siunnersuut Akileraartarnermut Atugarissaarnermullu Isumalioqatigiissitat sukumiisumik sulisimanerannik tunngaveqarpoq.*

Matumani siunnersuutigineqartut aammalu siunissami allanngortiterinermi siunnersuutaajumaartussat pillugit Sulisitsisut Peqatigiiffiata kissaatigaa sunniutaasut pillugit nalilersueqqissaartartussanik pilersitseqataassalluni, inuiaqatigiit ataatsimut aningaasaqarnerannut atatillugu aningaasarsiornikkut aammalu suliffeqarnikkut sunniutaasussat qulaajarneqartarnissaannut atorneqarsinnaasumik.

*Taamatuttaaq Naalakkersuisut soqutigisarivaat siunnersuutininut assigiinngitsorpassuarnut saqqummiunneqartussanut aningaasatigut sunniutaasussat pillugit nalilersueqqissaarnerit nukittorsarneqarnissaat inerisarneqarnissaallu. Taamaammat Sulisitsisut Peqatigiiffiata suleqataajumanera Naalakkersuisut ilassilluarlugu tikilluaqqaat.*

Sulisitsisut Peqatigiiffiannit tunngaviusumik akuersarneqarsinnaanngitsutut nalilernerneqarpoq arlalitsigut kingumut atuutilersumik inatsisiliortoqarniarnera.

*Matumani innersuussutigineqassapput oqaaseqaatit KPMG og Grønlands Revisionskontorimut akissutigineqartut.*

Sulisitsisut Peqatigiiffiat isumaqarpoq siunnersuut tassanngaannarpallaartumik ikaarsaariarfegartinneqassasoq, tamannalu suliffeqarfinnut, suliniutinik aallartitsinissaminnut pilersaaruteqartunut aallartitsereersunullu naapertuilluarnerunngitsoq, suliniutimmi ilaatigut akiliisinnaasutsikkut oqilisaataasumik akileraarutitigut ilanngaasinnaanermik aallaaveqarluni ingerlanneqarmata.

*Matumani innersuussutigineqassapput oqaaseqaatit KPMG og Grønlands Revisionskontor-  
imut akissutigineqartut.*

Sulisitsisut Peqatigiiffiata pissusissamisoorsoraa siunnersuut imatut ilusilerneqarpat, selskabit kipungasumik ukiunik naatsorsuusiorfillit, taamaammallu qangaammalli 2012-mut isertitassatut missingersuutiminnik saqqummiussereersut matumani ilanngunneqartussaajunnaassasut.

*Siunnersuummi § 2, imm. 2, matumani kissaatigineqartoq naammassiniarneqarpoq.*

Sulisitsisut Peqatigiiffiata tikkuarppaa, ernianut ilanngaasinnaanerp annikillisinneqarnissaa inuusuttunut inigisassaminnik siullermeerutaasumik pisiniartunut kinguneqarnerlussasoq, tasani akileraarutitigut oqilisaaneq ernianut oqilisaasinnaanermut sanilliullugu annikinnerunera eqqarsaatigineqarluni. Ineqarneq pillugu nassuiaammi aamma Naalakkersuisut siunniunni-kuuaat aningaasalersueriaaseq illuliorniartunut pitsaasoq annikillisinneqassasoq/atorunnaarsinneqassasoq. Ataatsimut isigalugu naatsorsuutigineqartariaqarpoq namminerisamik inissiali-  
liornermut annertuumik kingunerlutsitsisoqassasoq, tamannalu siunniussanut sanilliullugu killormut sammivoq, ineqarnermut tunngatillugu nutarteriniarluni pilersaarummi siunniunneqarsimammat naatsorsuutigineqarlunilu, pisortat inissianik sanaartornerat annikillisarneqassasoq namminersorlunilu inissiali-  
liornermik taarserneqassasoq.

*Ilumoorpoq ukiuni aggersuni ineqarnermut tunngatillugu allanngortiterisoqarnissaanik pilersaarusiortoqartoq. Ineqarnermut tunngatillugu allannguinerit isumaginninnermut ammalu akileraartarnermut allannguinerit qanittumik ataqatigiissaagaassaaq. Naalakkersuisut suliasaqarfinni pineqartuni allannguiniarnerminni siunertarinngilaat namminersorluni inissiali-  
liornerit unitsinneqassasut. Paarlattuanilli siunertaavoq namminersortut inissianik attartortittakkanik sanaartorsinnaanissaannut periarfissat annertusassallugit. Ineqarneq pillugu allanngortiterinissat pillugit siunnersuutit suliarineqarnissaat ukiap ingerlanerani aallartinneqassasut naatsorsuutigineqarpoq taamatullu pingasoriusamik oqaloqatigiinnermi ilanngunneqassasut naatsorsuutigineqarput. Taamatuttaaq aamma ilumoorpoq, ernianut aningaasartuutunik ilanngaasiisinaanerp 10 procentimik apparneqarnissaa inuusuttut annertuumik taarsigassarsiniarlutik namminneq inigisassaminnik pisisimasunut aningaasaqarnikkut inissisimanerannut ajorseriaateqartitsisoqarsinnaassammat. Naatsorsuinerit, Aningaasaqarnermut Naalakkersuisoqarfimmit ingerlanneqarsimasut ersersippaat inuusuttut ikittuinnaat ajorseriaammik eqqugaasussaassasut.*

Sulisitsisut Peqatigiiffiat erseqqissaateqarpoq, nalikilliliisinaanermut malittarisassat allanngortinneqarneratigut akileraarutissat siuartinneqarnerannik ersersitsimmat, isertitsissutaanerulersussat sivikitsuinnarmik sunniuteqassasut, tamatumalu kingorna ullumikkut isertitari-

sartakkat annertoqataanut utertoqassasoq. Taamaammat ersernerluppoq, qanoq ililluni atavartumik 21 mio. kr.-inik isertitsinerulernissamik naatsorsuisoqarsimanersoq. Pissutsit tassunga tunngasut qulaajarneqartariaqarput – taamaangippat akileraarutitigut allannguinerit naleqataanik aningaasatigut matussuserneqarnissaat amigaataalissaaq.

*Atavartumik sunniuteqarnissaanik naatsorsuusiordermi tunngavigineqarpoq, nalikillisaasinnaanermik malittarisassanik allannguinerup kingorna pigisat nalillit suut nalikillisarneqarsinnaanerannut tunngatillugu atavartumik allannguisoqartarnissaa. Taamaattumik pigisat nalillit ataasiakkaat akileraarutitigineqarnissaannik siuartitsinertut naliliisoqarsinnaagaluartoq, aningaasaliisarnermut periutsit ataatsimut nalilersorneqarnerisigut sunniutit atavartut anguneqassasut naatsorsuutigineqarpoq.*

Sulisitsisut Peqatigiiffiat isumaqarpoq, akileraariaatsit assigiinngitsut pioreersut aqutigalugit akileraarutitigut annertunerusumik piumasaqaateqarneq ataatsimut isigalugu aningaasatigut ingerlaartitsinermik ajorseriaateqartitsissasoq aammalu suliffissanik ikinnerusunik kinguneqassasoq. Paarlattuanik aningaasarsiornikkut ingerlatsinerit nutaat siunnerfigineqartariaqarput aammalu suliffissaqartitsineq annertusarneqartariaqarpoq naalakkersuininnut anguniakkat pillugit pitsaanerusumik suliassa qarfiit ataqatigiissaarneqarnerisigut.

*Siunnersuutit matumani saqqummiunneqartut akileraaruseeriatsimik allannguinnissamut ersiutaapput. Allannguneq pissaaq inummut akileraarutit apparnertigut, tassa sulinermi akileraarut pineqarpoq. Tamatuma paarlattuanik akileraarusersugassat nutaat atuutilersineqassapput, taamatuttaaq aamma akileraarutnermi maleruagassat naleqqussarneqartussaapput. Taamaalilluni akileraarutitigut piumasaqaatit allanngortinniarneqanngillat, paarlattuanilli akileraarutit akilernerneqartarnerannut piumasaqaatinut tunngatillugu agguasseqqinneq matumani pineqarpoq.*

*Naalakkersuisut isumaqataapput, qitiusumit suliassaasoq nutaanik aammalu annertunerusumik aningaasaqarnikkut ingerlatitsinerup piviusunnngortinniarnissaa anguniarlugu, aammalu tamatumani sakkussat ilagaat suliassa qarfiit assigiinngitsut pillugit naalakkersuinikkut anguniakkat ataqatigiissaarneqarnerisa pitsaanerunissaata sulissutigineqarnissaa pingaartuusoq. Taamaammanuna aamma ilaatigut tamanna siunertarlugu Naalakkersuisut, allannguinermi suliassat assigiinngitsut Aningaasaqarnermut Naalakkersuisoqarfimmut katersorsimagaat.*

Sulisitsisut Peqatigiiffiat aamma isumaqarpoq, akileraarutitigut allannguneq isumaginninnermi oqimaatigiissaarinissamik amigaateqartoq, tassami inummut akileraarutit appariartinneqarnera Sulisitsisut Peqatigiiffiata isumaa malillugu isertitaqqortunerusunuuenerusoq iluaqutisiiisussaammat. Taamaammat Sulisitsisut Peqatigiiffiannit siunnersuutigineqarpoq inummut akileraarut apparnagu sulinermi ilanngaammik atulersitsisoqartariaqartoq.

*Inummut akileraarutip apparneqarnissaanik siunnersuut kisimiitillugu isigigaanni ilumoorpoq, aningaasanngorlugu isertitaqqortunerit akileraarutitigut ileqqaagaqarnerusinnaalissasut. Procentinngorlugu naatsorsoraanni isertitaqatigiit tamarmik assigiimmik akileraarutitigut ileqqaagaqarsinnaapput.*

*Akileraarutit allanngortinneqarneranni inummut akileraarutip apparneqarneranut aningaasassaqtitsinissamik qulakkeerinnittussat, annertuumik tassaapput isertitaqqortunerit akileraarutaasigut aaneqartussat (ernianut ilanngaasinnaanermut pisinnaatitaaffiit apparneqarnerat), taamatuttaaq akileraartarnermik aaqqissuussinerup ullumikkut atuuttup equngassutaasa ilaanik iluarsinikkut (utaqqiisaasumik inigisanut akileraartannginerup, nalikilliliisinnaanermut malittarisassat annertuumik iluaqutissiisartut il.il. ) taamatuttaaq ilaatigut aalisakkat inuiaqatigiit ataatsimut pigisaasa pizarreqartarneranni tunniussineq annertunerusoq.*

*Akileraarutitigut allanngineq aqutugalugu siunertaanngilaq inuiaqatigiinni isumaginninnikkut equnganerusemik ingerlasoqalernissaa. Paarlattuanilli Naalakkersuisut qitiulluinnartumik anguniarpaat inuiaqatigiinni assigiinngitsumik inissisimaneq millisinniarlugu. Matumani innersuussutigineqassaaq 2025-ip tungaanut Naalakkersuisut pilersaarutaat, naatsorsuutigineqarporlu taanna september 2012-ip qiteqqunnerani tamanut saqqummiunneqarumaartoq.*

*Soorlu aamma siusinnerusukkut oqaatigineqareersoq, Naalakkersuisut isumaliutigisimavaat sulinermi ilanngaat atuutilersinniarlugu, taamaattorli paasisimavaat, isumaginninnermi aningaasat ullumikkut tunniunneqartartut naatsorsorneqartarnerat tunngavigalugu sulinermi ilanngaat atulersikkaluaraanniluunniit inunnut isumaginninnikkut nuussanik isertitalinnut imminut pilersorerulernissamut annertusaataanaviangitsoq.*

Inummut akileraarutip 1 procentimik apparneqarnera kissaatigineqartutut sunniuteqarumaartoq, inuit amerlanerusut ilinniarusulernerannik aammalu Kalaallit Nunaanni sulerusunermik kinguneqarumaartoq Sulisitsisut Peqatigiiffianit qularineqarpoq.

Sulisitsisut Peqatigiiffianit matumani tikkuarneqarpoq, Kalaallit Nunaanni inummut akileraarutip qaffasissusaa pissutaanngitsoq ilinniagaqartut ikittuinnaaneranunut aammalu Kalaallit Nunaanni sulerusussutsip annikitsuuneranut. Sulisitsisut Peqatigiiffiata naliliinera malillugu pissutsit allat matumani pissutaaqataapput, soorlu assersuutigalugu atorfimmi qaffassarsinnaaneq aammalu ineqarnermi atukkat il.il. pissutaaqataanerupput .

*Akileraarutitigut appaanissamik siunnersuut ukiuni aggettuni akileraartarnikkut-, ineqarnikkut aammalu isumaginninnikkut allannguinissat annertuut ilagaat.*

*Naalakkersuisut isumaqataapput inuit ataasiakkaat ilinniagaqalernissamik aammalu suliffeqalernissamik eqqarsaataanni pissutsit assigiinngitsut aalajangeeqataasartut. Inuit ilaasa pilersaarusiorminni aningaasatigut atugassat atugassanut allanut sanilliullugu pingaarnertittarpaat.*

*Misissuinerit ersersippaat, akileraarutitigut inissisimaneq sulisussanik neqerooruteqartarnermi pingaarteqartinneqartartoq. Maannamut ilimaginninnermut sanilliullugu paasinarsivoq, sulinermi akileraarut Kalaallit Nunaanni atuutsinneqartoq qaffasissorujussuannngorsimasoq. Akileraartarnermut atugarissaarnermullu ataatsimiititaliap ersersippaa akunnattumik isertitaqartut arlallit akornanni Danmarkimi sulinissaq Kalaallit Nunaanni sulinissamut sanilliullugu imminut akilersinnaanersooq. Tamanna pisinnaavoq naak massa Danmark tassaannngikkaluartoq nuna sulinermut akileraartitsisarnermigut appasinnerpaanut ilaasoq.*

*Naak massa inummut akileraartitseriaaseq Kalaallit Nunaanni atuutsinneqartoq assersuutigalugu Danmarkimi atuutsinneqartumiit pisariinnerugaluartoq, pissutissaqarluarpoq isumaliutigissallugu, aaqqissuussineq pitsaanerulersinneqarsinnaanersooq aammalu ullumikkumit patajannerulersinneqarsinnaanersooq.*

Sulisitsisut Peqatigiiffiat isumaqarpoq, aningaasaliissutit amigaataanerat sulilersitsiniarluni iliuseqarnerup sulissutigineqarnerani, kisiannili eqaatsumik ingerlasinnaanerup amigaataaneramik aammalu aaqqiissutit eqqortut amigaataanerannik pissuteqarnerusoq. Assersuut ilisimaneqarluartoq tassaavoq piginnaannngorsaaqqiiniarluni sulissuteqarneq.

*Inuusuttut 15-iniit 18-it tungaanut ukiullit sulilersinniarneqarnissaannut iliuusissat annertusarneqarnissaat tassaavoq ilaatigut 2012-imi ukiakkut pingasoqiusamik oqaloqatigiinnissami sammineqartussa. Isumaliuutit tamakku pillugit naatsorsuutigineqarpoq aamma kommunit akuutinneqassasut.*

Sulisitsisut Peqatigiiffiat tikkuaavoq, ernianut ilanngaait killilersorneqalernissaat kinguaariit nikittarnerannut sunniteqarnerlussasoq, nikinnissaagaluit tamakkiisumik ilaannakortumilluunniit suliffeqarfimmik piginneqataassummik pisinikkut ingerlanneqartussaagaluit matumani pineqarlutik.

*Taarsigassarsiat atorlugu piginneqataassutsinik pisineq inuussutissarsiornermut taamaallat tunngatinneqarsinnaavoq, pisisusaaq piginneqatigiiffinnik niuerluni suliffeqarfimmik ingerlataqareerluni piginneqataassutinik pisiniarpat. Pisuni allani, matumani aamma kinguaariit nikinnerannut tunngasuni, pisinerit taamaattut nammineq pisinertut isigineqartariaqarput.*



KANUKOKA tikkuaavoq, nunani allani akileraarutitigut oqilisaanerit pisortat suliasaqarfiini sipaarniarnikkut aammalu eqaallisaanikkut aningaasalersorneqartartut. Naalakkersuisut akileraarutitigut allannguinnissamik siunnersuutaat aningaasalersorniarneqarpoq akileraartartut allat akileraarutaasigut isertitat atorlugit. Allatut oqaatigalugu aningaasat innuttaasut kaasarfiannit talerperlermiit tiguneqartaraluartut saamerlermiit tiguneqartalissapput. Ineriartortitsinissamik siunertaqarluni suliniarnermut tamanna annertunerusumik isumaqarnaviannigilaq, akileraarutitigut isertitat annertussusaat annertunerpaatigut allannguuteqarnaviannigimmat. Paarlattuanilli allaffissornikkut aningaasartortoqarnerulissaaq aningaasat taakku 75 mio. koruuniusut innuttaasut kaasarfiinit aaneqartussat matussuserniarlugit.

*Nunani allani akileraarutitigut allanngortiterinerpassuit ilusaasa mikisualuttaat Naalakkersuisut ilisimasaqarfinginngilaat. Danskit ukiuni kingulliunerusuni akileraarutitigut allanngortiterinerat, pingaartumik sulinermi akileraarutit apparneqarnissaannik siunertaqarnerusut danskit aviisiini oqallisigineqarlutillu allaaserineqartartut nalilersussagaanni, maluginiarnarpoq, akileraartitseriaatsip atuuttup allanngortiterneqarneratigut aammalu pisortat ingerlataanni sipaarniarnikkut eqaallisaanikkullu aningaasat matussutissaasut pissarsiarineqartarput.*

*Ilumoorpoq akileraarutitigut allannguinnissamik siunnersuutigineqartoq akileraarutit akitsuitillu nutaat atulersinneqarnerisigut imaluunniit pioreersut allat allanngortinneqarnerisigut aningaasalerneqassasoq siunnersuutaammat. Matumani iliuusissatut siunnersuutigineqartut aqutigalugit naapertuutinnigitsumik akileraartitsisarnerit ullumikkut atuuttut aqqiiviginiarneqarput aammalu akileraartarnermut tunngaviusoq annertusarniarneqarluni. Taamaammat akileraarutit annertussusaat annertunerpaatigut allanngornaviannigikkaluartoq, allannguinerup malitsigisaanik pitsaanerusumik aammalu patajaannerusumik akileraartitseriaaseqalernissaq pilersinneqassaaq aammalu sulinermi akileraarutit appasinnerulissapput.*

*Pisortanut aningaasartuutit allannguinerup kinguneranik pilersussat, inatsisissatut siunnersuutini soorlu ersersinneqartoq matussuserneqassapput aningaasaliissutaareersut atorlugit.*

KANUKOKA tikkuaavoq, pisortat ingerlataanni aningaasartuutikillisaanikkut akileraarutip appartinneqarnera aningaasalersorneqanngippat, ineriartortitsinermik anguniagaqarneq ajorse-riaateqartinneqassasoq. Isertitat akileraarutaannik appaaneq immi isertitaqqortunerusunut naleqarnerummat isertitakinnersusunut sanilliullugu. Inerisaanermut tunngavissiuussiumagaanni imaluunniit inuussutissarsiuteqartunut unammillernermik tunngaveqartunut sulisunut aningaasartuutit appaaviginiaraanni, isertitat akileraaruserneqarnerannik appaaneq aqqutissaanngilaq, aqqutissaavorli ilanngaati minnerpaaffia qaffassallugu (sulinermi ilanngaati). Matumani siunnersuut taaneqartariaqarpoq ”Robin Hood killormoortoq”.

*Ineriartortitsinermut periarfissat pillugit aammalu siunnersuutit isumaginninnermi oqimaatigiissaarinnermut tunngasortaanut atatillugu Sulisitsisut Peqatigiiffiannut Naalakkersuisut oqaaseqaataat matumani innersuussutigineqassaaq. Ineriartortitsinermi politikkip pisortat appasinnerusumik aningaasartuuteqalernissaannut tunngatillugu eqqarsaatigiinnissamik KANUKOKA-p isumaanut Naalakkersuisut isumaqataapput.*

*Naalakkersuisut akileraartarnermi, ineqarnermi inunnillu isumaginninnermi inatsisinik allangortiterinermi alloriarnermut tullermut atatillugu, Namminersorlutik Oqartussani kommuninilu aningaasartuutinik appasinnerulersitsisinnaasunik iliuusissanik saqqummiussiniarput.*

KANUKOKA-ip ilanngullugu oqaatigaa, erniat ilanngaatigineqarnissaannut periarfissat annikillineqarnissaannik siunnersuut naligiinnerusumik agguaanissamik suliniuteqarnermut naapertuuttoq. Taamaattorli KANUKOKA apeqqusiivoq annikilliliinerup kingunissai pillugit, ineqarnermut tunngatillugu inissialiortarnermut tapiissutit annikillisarneqarnissaannik siunertaqarneq innersuussutigalugu. KANUKOKA-p aarleqqutigaa, siunnersuutit ataatsimut isigalugit naligiinnerusumik agguaatigiinnissamik siunertaqarnermut naapertuutinngitsumik suniuteqassasoralugu, akileraarutitigut allanngineq aqutugalugu isertitaqqortunerit iluaqutis-sinneqarnerunissaat innersuussutigineqarluni.

*Matumani innersuussutigineqassaaq ernianut ilanngaateqarsinnaanerup annikillineqarnissaanut aammalu ineqarnermut allangortiterinissamut tunngatillugu Sulisitsisut Peqatigiiffiata oqaaseqaataanut Naalakkersuisut akissutaat.*

Utaqqiisaasumik ineqartitaasarnermi akileraarusersuisoqartalernissaanut tunngatillugu aammalu nalikilliliisarnermut tunngatillugu siunnersuutinut KANUKOKA immikkut oqaaseqaateqanngilaq.

Naggataatigut KANUKOKA-p erseqqissaatigaa, pissusissamisoornerpaajussasoq isertitaqarnerulissutaasussat pillugit naatsorsuinerit nalinginnaasumik isertitat iluanaarutit naatsorsorneqartarnerannut atatillugu suliarineqarpat, eqqoriaalluni annertussusiliineq kommuninut tapiissutit aqutugalugit ilanngaatit atornagu.

*Pissutsit taakku kommunit peqatigalugit oqaluuserineqarumaarput kommuninut ataatsimoor-tumik tapiissutit isumaqatigiinniutigineqarnerannut atatillugu.*

ELB-ip erseqqissaatigaa, nalikilliliisinnaanermit siunnersuut namminersortutut nammineq assut ajuusaarnartuusoq. ELB-p suliffeqarfia inerisarneqaleruttorpoq massakkullu Kangerlusuarmi unnuisarfiup vandrehjem-ip immikkoortua siulleq ammaqgammersimallugu. Ukiuni

tulliuttuni sisamani inerisaanerup immikkoortui tullinnguuttut sisamat aningaasaliiffigin-naajumallugit ukiuni sisamani tulliuuttuni kiffaanngissuseqarluni nalikilliliisinnaaneq pisari-aqartippaa. Tamanna periarfissaajunnaassappat, ELB-p aningaasatigut sillimasinnaanera annikippallaalissaaq. Suliap immikkoortuani siullermi unnuisarfik pilersinneqarsimasoq tamakkiisumik sulisoqarsinnaanissamut aammalu ukioq naallugu ammasarsinnaanissamut mikivallaarpoq. Nalikilliliisinnaanermut malittarisassat nutaat atuutilissappata, ELB akile-raarutitigut iluaqutissinniarluni iliuuseqartariaqalersinnaavoq. Soorlu aamma ELB taamaallaat anitsualunnik pisiniarsinnaalissaaq. Nalikillisaasinnaanermut malittarisassat allanngortinne-qassappata ELB annertuumik eqqugaassaaq, tamatumalu kingunerisaanik suliffeqarfini ineriartortissinnaajunnaassavaa, imaluunniit akigititani qaffattariaqassavai imaluunniit akile-raarutitigut iluaqutissinniarluni aqutissioartariaqalersinnaavoq. Taamaattorli aqutissaasin-naasunik ujartuilluni periarfissat tamaasa atortariaqalertussaallugit aarleqquteqarpoq. ELB-p suliffeqarfini aallartissinnaasimavaa tunisassiornermut ineriartortitsinermut tapiissutit ator-lugit. Siunertaasimagaluarpoq, suliap immikkoortuisa tullii nammineq aningaasalersorlugit inerisassagai. Kisiannili taamaalorsinnaajunnaassaaq taamaammallu ukiup tullissaanut inuussutissarsiutitigut tapiissutinik amerlanerusunik qinnuteqartariaqassaaq.

*Nalikilliliisarnermut malittarisassat siunnersuutigineqarnerini siunertarineqarpoq akileraa-rutitigut nalikilliliinerit aammalu pigisat nalillit aningaasatigut nalikilliarortarnerisa nali-killiliisarnermi naapertuunnerusumik ingerlalnissaat, aammalu siunertaavoq namminer-sorlutik inuussutissarsiuteqartut aammalu selskabit akileraarutitigut pineqarnerisa naligiin-nerulernissaat.*

*Tamatumunnga ilutigitillugu inuussutissarsiornermut ineriartortitsinermut tapiissutit toq-qaannartumik tunniuttarnissaat aqutissaalluarnerusinnaavoq sanilliullugu toqqaannan-ngitsumik akileraarutitigut ajunngitsorsiasstat inuiaqatigiinni eqimattat ilaannut tunnius-suunneqarnerannut sanilliullugu.*

ELB-p paasisinnaanngilaa, nalikilliliisarnermut malittarisassat allanngortinneqarnerisugut qanoq ililluni nunatta karsianut isaatitsinerulersitsisoqarsinnaanersoq.

*Matumani innersuussutigineqassaaq akileraarutit siusinnerusukkat akilerneqartarnissaannut tunngatillugu Sulisitsisut Peqatigiiffiannut Naalakkersuisut akissuteqaataat.*

ELB aperivoq, inatsisissatut siunnersuummi § 2, imm. 2 aamma 3, isumaqarnersut, ukiumi aningaasarfiusumi 2012-imi suli kiffaanngissuseqarluni nalikilliliisinnaanerluni, aammalu paaserusuppaa ingerlaannartumik nalikilliliisinnaanerluni pisiniarnermi ataatsimi 100.000

koruuninik nalilinnik pisisimaguni aammalu paaserusuppaa ukioq 2014-imiit nalikilliliisinaatitaanini 50.000 koruuninut killeqartinneqalissanersoq.

*Inatsisissatut siunnersuummi § 2, imm. 3-ip malitsigissavaa, inuussutissarsiortunut namminersortunut nalikilliliisinnaanermut malittarisassat ukioq 2012-imut aamma atuutissasut.*

*Namminersorlutik inuussutissarsiuteqartut ingerlaannartumik nalikilliliisinnaaneranun malittarisassanut tunngatillugu siunnersuutigineqarpoq, ingerlatsinermut atortunik pisiarnermi ingerlaannartumik nalikilliliisoqarsinnaassasoq 2013-imi pisiat 100.000 koruunit tungaanut naleqarsimappata 2014-imiillu siunissamut 50.000 koruunit tungaanut naleqarsimappata.*

*Matumani nalornisoqaqqunagu erseqqissaatigineqassaaq, illuummik iluarsartuussinissamik siunertaqarluni sanaartornermut atugassat pisiarineqarsimasut illuutip nalunaarutigineqarneranut ilaatinneqassammata nalikillisaanermilu illuummut ilaasutut nalilikillisarneqassammata.*

ELB aperivoq, nalikilliliisarneq pillugu namminersortunut ilitsersuummik suliaqartoqassanersoq.

*Akilerartarnermut Aqutsisoqarfik taamaattumik suliaqassalluni aallartitsissaaq.*

ELB-p kissaatigaa, nalikilliliisarnermut malittarisassat nutaat namminersortunut mikisunut periarfissaqartitsilluarluni kingusinnerusukkut atuutsinneqalissasut.

*Siunnersuutip siunertaa innersuussutigalugu pissusissamisoornerpaatinneqarpoq malittarisassat nutaat 2013-imiit atuutsinneqalerpata.*

Ilinniartitaanermut Ilisimatusarnermullu Naalakkersuisoqarfik aammalu Aalisarnermut, Piniarnermut Nunalerinermullu Naalakkersuisoqarfik siunnersuummut oqaaseqaateqanngillat.

## **Inatsisissatut siunnersuummi aalajangersakkanut ataasiakkaanut oqaaseqaatit**

### *§ 1-imut*

#### Nr. 1-imut

Siunnersuutigineqarpoq aningaasarsiat akileraaruteqaataasussat naatsorsornerini ernianut aningaasartuutit ilanngaatigineqarsinnaasut aningaasartuutit 90 procentianut killilerneqassasut. Killiliinerli atuutinngilaq aningaasartuutit namminersorluni inuussutissarsiornermut attuumassuteqarpata.

Erniat, sullissinermut matussutissatut ernialiussat il.il. aalajangersakkami immikkoortut 1-imiit 3-mut naapertorlugit, inatsimmi § 24, imm. 1, nr. 3 tunngavigalugu (takuuk nr. 6 pillugu ataani oqaaseqaatit) aningaasarsiat akileraaruteqaataasussat naatsorsornerini ilanngaatigineqarsinnaasut siunnersuummi pineqarput.

Ernianut aningaasartuutit nammineq atugassanut imaluunniit namminersorluni inuussutissarsiornermut attuumassuteqartuunerisa aalajangiiffigiarneri amerlanertigut ajornartorsiutaanaviannngilaq.

Nalornisoornermi ingerlatsinermi aningaasartuutit pillugit nassuiaatit inatsisip § 24-iani allasimasat tunngavigineqassapput. Ernianut aningaasartuutit inuussutissarsiornermut attuumassuteqassapput, inuussutissarsiornerup akileraartussaataasup annertunerusumik aningaasartuuteqarsimanerani kinguneqartoq takutinneqarsinnaappat, inuussutissarsiornermullu attuumassuteqartumik ernianut aningaasartuuteqarnissap pisariaqartinneqarsimaneera ilanngullugu takutinneqarpat.

Ernianut aningaasartuutit inuussutissarsiornermut namminerlu atugassanut ataatsikkut attuumassuteqarpata, aningaasartuutit siunertanut marlunnut taakkununga agguarneqassapput. Assersuutigalugu pigisamik aalaakkasumik pisinermut atatillugu taarsigassarsisoqarsimappat, pigisarlu aalaakkaasooq inuussutissarsiornermut namminerlu inuttut akuleriisillugu atornerqarpat, pigisamik aalaakkaasumik atunerup kvadratmeterinut agguarneqarnera malillugu ernianut aningaasartuutit agguarneqassapput. Ernianut aningaasartuutit naatsorsuutininut allasimasat inuussutissarsiornermut namminerlu atugassanut attuumassuteqarpata, ingerlatsinermi kontomiit nammineq inuttut kontomut nuunneqarneri naatsorsuutini takutinneqassapput.

#### Nr. 2-mut

Siunnersuutigineqarpoq aningaasarsianik akileraaruteqaataasussanik naatsorsuinermi inissiani tamakkiisumik ilaannakortumilluunniit akeqanngitsumik ineqartitaanerit nalingi, matumani ilanngullugit utaqqiisaasumik inissiani aammalu utaqqiisaasumik inigisassaq sioqqullugu inissiani ineqartitaanerit nalingi ilanngunneqassasut. Siunnersuummi ilaatinneqanngillat tunissutit aningaasarsianit akileraarutit pillugit inatsimmi § 34, imm. 1, nr. 3-mi pineqartut.

Utaqqiisaasumik inissiat aamma utaqqiisaasumik inigisassaq sioqqullugu inissiat, taakkununga ilanngullugit ineeqqat, inissiaaqqat il.il. tassaapput atorfinitsitaanermut atatillugu ineqartinneqarneq sioqqullugu inigitinneqartut.

Utaqqiisaasumik inissiani ineqartitaanerit aamma utaqqiisaasumik inigisassaq sioqqullugu inissiani ineqartitaanerit akileraarusersorneqarnissaat pissaaq tamakkiisumik ilaannakortumilluunniit akeqanngitsumik ineqartitaanerit akileraarusersorneqartarnerannut periutsit assigalugit.

Ineqartitsisup, akileraaruserinermik ingerlatsineq pillugu inatsimmi § 30, imm. 1, nr. 4 naapertorlugu ineqartitsinerup nalinga akileraaruseriffimmut nalunaarutigissallugu pisussaaffigaa.

Nr. 3-mut

Siunnersuutigineqarpoq sinneqartoorutit akileraaruteqaatiginissaasa akileraarutitigut nalikilliliissuteqarnerunikkut kinguartinneqarsinnaanerinit maleruagassat, inatsimmi § 22, imm. 1-imiittut atorunnaarsinneqassasut.

Nr. 4-mut

Siunnersuutigineqarpoq selskabit ingerlaannaq nalikilliliisinnaanerinut killigitinneqartoq 15.000 korduuninut appartinneqassasoq.

Nr. 5-imut

Siunnersuutigineqarpoq nalikilliliinermi periutsit selskabinut atuutsinneqartut namminersorlutik inuussutissarsiornermik ingerlataqartunut atuutsinneqalissasut, ingerlaannarli nalikilliliisinnaanermut killigititaasoq qaffasinnerusumik angissusilerlugu.

Imm. 1-imut

Aalajangersakkami pineqarput akileraartussaataasut inatsimmi § 1, imm. 1, nr.1-imi, 2-miluunniit taaneqartut imaluunniit § 2 naapertorlugu killilimmik akileraartussaataasut.

Imm. 2-mut

Namminersorluni inuussutissarsiornermik ingerlataqartup pigisai nalikillilerneqarsinnaasut il.il. pingasunngorlugit agguarneqassapput ima:

- Illuutit atortullu ikkussorneqarsimasut.
- Umiarsuit timmisartullu.
- Pigisat nalillit aningaasartuutillu nalikilliliissutigineqarsinnaasut allat.

Pigasat nalillit, nr. 1-imi aamma 2-mi taaneqartut nr. 3-mut naleqqiullugit killilerneqarnerat, akileraartarnermi nalikilliliinerit pillugit il.il. nalunaarut naapertorlugu pissaaq.

Inuussutissarsiortup nalikilliliinermini ilanngaatisinnaanngilai nalikilliliinerit ukuninnga annertunerusut:

1. Illuutit atortullu ikkussorneqarsimasut pissarsiarineranni nalingisa 5 procentii.
2. Umiarsuit timmisartullu pissarsiarineranni nalingisa 10 procentii.
3. Ukiup aningaasarsiorfiusup naanerani pigisat il.il. nalikillilerneqarsinnaasut soorlu ingerlatsinermut atortut, pequtit pissarsiarineranni nalingi aammalu pigisanut piffisami killilimmi pisinnaatitaaffinnut akiliutinut il.il. aamma init attartukkat allangortitsernerinit aningaasartuutit imaluunniit ikkussuinerit aningaasartuutit 30 procentii, selskabip inuussutissarsiornermi ingerlanneqarneranut pingaaruteqartut.

4. Ingerlatsinermut atortut pissarsiarineranni nalingi 50.000 koruuniuppata taakkualuunniit ataallugit nalingisa 100 procentii.

Immikkoortuni 1-imiit 4-mut assigiinngitsuni inuussutissarsiortut qinersinnaavaat nalikilliliniissamut periarfissat tamakkiisumik ilaannakortumilluunniit atornissaat imaluunniit pigisat ataasiakkaat nalikillilivigisinnaallugit.

Nalikilliliinermi malittarisassat allanngortinnerisa kinguneraat immikkoortuni 1-imi aamma 2-mi pigisat ataasiakkaat nalunaarsorneqassasut aammalu kontomik nalunaarsuiffeqassasooq pigisap pisiarinerani akianik takutitsisumik tassungalu pitsanngoriaataasinnaasut ilassutigalugit kiisalu aningaasartuutit nalikilliliinerillu. Kontomi, ukiut naaneranni tamani naatsorsorneqartartussami, pigisat nalinginit nalikilliliissutigineqanngitsut annertussusiat takuneqarsinnaassalluni.

Pigisat nr. 1 aamma 2-mi taaneqartut nalikillilerneqarnerannut tunngatillugu, nalikilliliineq pissaaq pissarsiarinerini akiata ukiut tamaasa assigiiaartumik annertussuseqartumik nalikillilerneqarneratigut – aamma taaneqartartoq assigiiaartumik nalikilliliineq. Pingaaruteqanngilaq ukiup qanoq ilinerani pigisaq pissarsiarineqarnerasooq, tassa tamatigut ukiumi pisiffiusumi ukiumut nalikilliliissutaasinnaasunik tamakkiisumik nalikilliliisoqarsinnaammat. Akerlianik ukiumi pigisamik tunisaqarfiusumi tunisaq tunineqarsimasooq nalikillilerneqarsinnaanngilaq imaluunniit ukiumi suliffeqarfiup atorunnaarsinneqarfiani nalikilliliisoqarsinnaanngilaq.

Imm. 3-mut

Nalikilliliinernut nr. 3 aamma 4-mi pineqartunut tunngatillugu oqaatigineqassaaq, aalajangersakkami ilaammata pigisat nalikillilerneqarsinnaasut aningaasartuutillu tamarmik nr. 1 aamma 2-mi pineqanngitsut aammalu akileraarutitigut nalikilliliinerit il.il. pillugit nalunaarut malillugu nalikillilerneqarsinnaasut.

Pigisanik taakkunannga nalikilliliineq qaqugukkulluunniit nalingisaat tunngavigalugu nalikillileeriaaseq malillugu pisassaaq. Tassa imaappooq pigisat/- aningaasartuutit taamaattut pillugit selskabip pisinerani aningaasartuutit tamakkerlugit, pigisat taamaattut tunineranni imaluunniit pisinnaatitaaffiit il.il. tuninerannilu pissarsiat ilanngaatigalugit, ukiumut nalikillilerneqarsinnaapput 0 aamma 30 procentit akornanni ilivitsunngorlugu procenti nammineq aalajangerlugu. Ukiumut nalikilliliissut taanna nalingasut nalunaarsorneqarsimasumit nalikillilerneqarsinnaasumit tamarmiusumit ilanngaatigineqassaaq. Taamaalilluni nalikilliliissutit annikilliarortinneqassapput.

Inuussutissarsiortup ukiumi pisiffiusumi pigisat nr. 4-mi pineqartut, tassa pigisat 50.000 kr.-inik ataalluguluunniit nalillit, tamakkiisumik nalikillilerneqarnissaat kissaatiginnippagu, pisiarinerani nalinga nalikillilerneqanngitsooq ukiup pisiffiusup naanerani nalikilliliissutaasinnaasup annertussusaat naatsorsorneqartumut ilanngunneqassaaq. Taassuma kingorna pisiarinerani nalingata ilaa nalikilliliissutaanngitsooq ukiumi tassani nalingatut nalunaarsorneqartumut ilaassaaq aammalu nr. 3-mi malittarisassat malillugit 30 procentit tikillugit nalikillilerneqassalluni.

Inuussutissarsiortut, aatsitassat il.il. pillugit Inatsisartut inatsisaat malillugu misissuinissamut imaluunniit atuinissamut akuersissuteqarfigineqarsimasunut atuuppoq, pigisat tunisassiornermi atortut ingerlatsinermi atortut isigineqartarnerattut. Pigisat tunisassiornermi atortut imatut

paasineqassapput, nunami aalajangersimasumik tunisassiorfiit il.il., sulliviit puttasut aalajangersimasut nuunneqarsinnaasulluunniit tassungalu atasut ingerlatsinermi atortut maskiinallu, ruujorit, pumpit, tankit uninngatitsiviit atortullu allat aammalu sulliviit puttasut immikkoortut akunnittarfiusut. Umiarsuit illullu, tassunga ilanngullugit illut allaffissornermi atorneqartut tunisassiornermi pigisatut isigineqanngillat.

Imm. 4-mut

Pigisat nr. 3-mi aamma 4-mi pineqartut nalingisa nalikilliliissutaasinnaasut annertussusaat qimmussimappassuk, nikingassut naatsorsugaq ukiumi aningaasarsiorfiusumi tassani isertitatut nalunaarutigineqassaaq.

Nalikilliliissutaasinnaasut annertussusaat naatsorsorneqartup minusiunerata takutippaa, pigisat pineqartut tunineranni iluanaarut sulii nalikillilerneqanngitsunit annertunerusimasoq. Taamaatumik nalikillilerneqareersut akileraaruserneqartussaapput.

Nr. 6-imut

Siunnersuuteqarnermi siunertarineqarpoq ernianut aningaasartuutit ilanngaaticigineqarsinnaasut killilerneqarnerisa imaluunniit taakkununga atuutilertussatut siunnersuutigineqartut erseqqissaaviginissaat.

#### *§ 2-mut*

Siunnersuutigineqarpoq Inatsisartut inatsisaat 15. december 2012-imi atuutilissasoq, sunniuteqartumillu atortussanngortinneqassalluni ukioq aningaasarsiorfik 2013 aallarnerfigalugu, peqatigitilluguli siunnersuutigineqarpoq selskabit sinneqartoorutaasa akileraaruteqaatiginissaasa akileraarutitigut nalikilliliissuteqarnerunikkut kinguartinneqartarnerisa allannguutissaat ingerlaannarlu nalikilliliissinnaanerintu killigititap appartinneqarnera ukioq aningaasarsiorfiusoq 2012 aallarnerfigalugu atuutilissasut.

Siunnersuutigineqarpoq ukiumut aningaasarsiorfiusumut 2012-imut, selskabit sinneqartoorutaasa akileraaruteqaatiginissaasa akileraarutitigut nalikilliliissuteqarnerunikkut kinguartinneqarnerisa, selskabit sinneqartoorutaannit akileraaruteqaataasussanit 25 procentinut killilerneqassasoq, tamannali pissaq akileraarutitigut nalikilliliisoqareerneratigut. Sinneqartoorutit akileraaruteqaatiginissaasa akileraarutitigut nalikilliliissuteqarnerunikkut kinguartitsisinnaaneq taamaasilluni atorunnaavissaq ukioq aningaasarsiorfik 2013 aallarnerfigalugu. Ikaarsaariarnermi aaqqiineq, malittarisassanik allannguinerusoq, selskabit naleqqussarnissaannut qulakkeerinnissaq. Ukioq aningaasarsiorfik 2012 selskabinut il.il., ukiumik kippingasumik aningaasarsiorfeqartunut, piffissaq naatsorsuusiorfik 31. august 2012-imut siusinnerusumiluunniit killeqarpat, siunnersuutigineqarpoq inatsit sunniuteqartumik aatsaat atuutilissasoq ukioq aningaasarsiorfik 2013 aallarnerfigalugu.

Siunnersuutigineqarpoq ukiumut aningaasarsiorfiusumut 2013-imut, namminersorluni inuussutissarsiutillit, aningaasartuutinut aamma pissarsiarineranni nali 100.000 koruuniuppata taak-kualuunniit ataallugit naleqarpata ingerlaannartumik nalikilliliissinnaanissaat. Siunnersuutigineqartutut 50.000 koruuninut killiliineq ukioq aningaasarsiorfiusumit 2014-imiit tamakkii-sumik aatsaat sunniutissaq. Ikaarsaariarnermut aaqqiinerup taassuma, malittarisassanik allannguinerusoq, namminersorluni inuussutissarsiutillit naleqqussarnissaannut periarfissiissaaq.